



20.12.2011. U organizaciji Udruženja poslodavaca BPK Goražde danas je održan sastanak na temu „ Unapređenje poslovnog ambijenta na području BPK Goražde“. Sastanku su pored predstavnika Udruženja poslodavaca prisustvovali premijer BPK Goražde, ministar za privredu BPK Goražde, drugi predstavnici Ministarstva za privredu BPK Goražde, predstavnici Ekonomsko-socijalnog vijeća BPK Goražde, te direktorica Službe za zapošljavanje BPK Goražde.

Na sastanku se između ostalog raspravljalo o stanju u kojem se nalaze privredni subjekti, te na koji način bi se ambijent u kojem trenutno posluju mogao unaprijediti.

Gosp. Ibro Mašala, predstavnik Udruženja poslodavaca je naglasio da se mora posvetiti pažnja privrednim subjektima , koji stvaraju novu vrijednosti, te pored toga krenuti više u razvojne projekte, poput izgradnje brze ceste „Sarajevo-Goražde“, iskoristiti energetske potencijal, kao i razviti sektor poljoprivrede, gdje vidi šansu u zapošljavanju mladih ljudi, koji bi mogli stvoriti egzistenciju svojoj porodici u toj branši uz malu pomoć Vlade kroz određen podsticaj.

Gospođa Nasiha Džaka je ukazala na težak položaj zadruga, kao i stanju u poljoprivredi te apelovala na nadležne da se treba više pažnje posvetiti tom sektoru.

Premijer BPK Goražde gosp. Emir Frašto je rekao da cijeni ovakve skupove, te da bi trebali biti češći i efikasniji, te da svi zajedno treba da učestvujemo u rješavanju problema. Ministar za privredu gosp. Demir Imamović je rekao da je napravljen veliki iskorak u poljoprivredi, te da ima dosta mladih ljudi koji hoće da se bave poljoprivredom i uz manju podršku Vlade oni uspijevaju obezbijediti sebi egzistenciju. Istakao je takođe da je i „Mljekara“ pravac u kojem se može ići, te da ima određenih prijedloga rješenja tog problema. Kazao je takođe da će se i dalje nastaviti podsticaj privredi u cilju većeg zapošljavanja.

Direktorica Službe za zapošljavanje gospođa Nafija Hodo je istakla da je Služba za zapošljavanje servis i poslodavcima i Vladi, te je naglasila da je u posljednja 3 mjeseca stopa nezaposlenosti u našem kantonu smanjena za 8%, što u mnogome doprinosi ukupnom stanju. Naglasila je posebno podatak da je Služba već izvršila prekvalifikaciju 300 osoba za firmu „Prevent Goražde“, te da će i dalje nastaviti s tim sve do kraja, kako je i ugovoreno. Na kraju

sastanka donesen je Zaključak da se ubuduće ovakvi sastanci održavaju češće i sa određenim temama.